


# PAGTOO

 Pero kinahanglan mong gamiton ang pagtoo mo sa Dios, aron makapamuhat kini. Kita n'yo? Busa aduna ka'y kaugalingon mong pagkabanhaw sa sulod mo. Anaa ang imong pagkabanhaw sa sulod mo, sa imong espiritu.

<sup>2</sup> Karon, kabalo mo, niadtong si Jesus namatay didto sa krus, “Ang Iyang kalag mikanaug ngadto sa impiyerno ug nagwali Siya ngadto sa mga kalag nga atua sa bilanggoan, nga wala naghinulsol niadtong pagkamapailubong mga adlaw ni Noe.” Ang Iyang lawas mipaingon sa lubnganan. Pero, sa wala pa Siya namatay, gitugyan Niya ang Iyang Espiritu ngadto sa mga kamot sa Dios. Sa kamot. . . “Sa Imong mga kamot ginatugyan Ko ang Akong Espiritu.” Busa, nakita n'yo, ang Iyang Espiritu mipaingon sa Dios; ang Iyang kalag miadto sa impiyerno; ang Iyang lawas atua sa lubnganan.

<sup>3</sup> Bueno, kana nga Espiritu nga atua Kaniya mao ang mismong Espiritu sa Dios. “Kana nga Espiritu, sa nagkalainlaing mga panahon ug sa nagkalainlaing mga paagi, gidihogan ang mga propeta, aron maihatud ang Mensahe sa mga tawo; nga sa kaulahiing mga adlaw, pinaagi ni Cristo; ug karon, sa niining mga adlaw dinhi, pinaagi sa Ebanghelyo.” Karon, sa dihang gidawat nato si Cristo sulod sa atong kasingkasing, kana na ang tanan nga gikinahanglan nato mismo. Aduna pud og Kinabuhing Walay Katapusan.

<sup>4</sup> Karon, dili makabalik niadto si Cristo hangtud nga matuman unà ang tulo ka adlaw. Tungod kay, ang Iyang Espiritu atua sa luyo sa usa ka tabil, nga mora'g nababagan, nga mora'g *ingon-ani*, nga dili Siya makatabok sa maong salipud, tungod kay gipamulong na kadto sa Pulong sa Dios, nga, “Siya'y kinahanglan matugyan sa lubnganan sulod sa tulo ka adlaw ug tulo ka gabii.” Karon, dili Siya makabalik hangtud nga kadtong tulo ka adlaw ug gabii matapos unà. Dayon sa diha nga ang tulo ka adlaw ug gabii matapos na, ang Iyang Espiritu pagabuhian. Mipaingon Kini mismo sa Iyang kalag, ug mibalik ang Iyang kalag ug gikuha ang lawas, ug gituman kung unsa ang gisulti Niya, “May kagahum Ako sa pagtugyan sa Akong kinabuhi. May kagahum Ako nga bangonon kini pag-usab. May kagahum Ako.”

<sup>5</sup> Karon, ang matag usa sa inyo adunay kagahum, sa samang paagi, tungod kay kamo mga anak nga lalaki ug anak nga babaye sa Dios. Ug ang mismong Espiritu nga anaa sa inyo, karong buntaga, ang Balaang Espiritu nga anaa sa inyo karong buntaga, kanang mao ra nga Balaang Espiritu magabangon sa inyo. Mao nga, may kagahum kamo para bangonon ang inyong kaugalingon.

6 Kung mamatay mo, ang kalag ninyo mopaingon sa—sa . . . ilalum sa halaran sa Dios, dili sa . . . mismong Presensiya sa Dios. Karon, ang espiritu ninyo mopaingon sa Dios, pero dili kamo puedeng mobalik. Hinumdumi ninyo, diha sa Biblia, ang ingon Niini nga ang espiritu . . . “Ang mga kalag nga anaa ilalum sa halaran, nanagtuaw, ‘Ginoo, unsa pa ba ka dugay, unsa pa ba ka dugay?’” Ug dili gyud sila puedeng makabalik hangtud nga ang Kasulatan matuman, ug, sama ni Cristo, dili gyud makabalik hangtud nga ang Kasulatan matuman. Dayon, human, nga ang tanan matapos na, nga tapos na ang tanang pag-antus, ug kadtong mga igsoon nag-antus usab sa mao gihapong mga butang, o kita nag-antus sa mao gihapong pag-antus nila, ug uban pa; dayon, nianang adlaw, mahibaloan mo mismo kung asa ka gilubong, ang imong espiritu pagabuhian gikan sa Dios ug mopaingon ngadto sa kalag.

7 Karon, ang kalag mao ang bahin mo nga nakahibalo ug nakasabot, ang imong salabutan. Nadumduman n’yo ba kadtong panan-awon nga nagkaaduna ako dili pa lang dugay, o niadtong diyutay’ng pagsakgaw, nga mipaingon ako niadtong dapita ug nakita kadtong mga tawo? [Nagaingon ang kongregasyon, “Amen.”—Ed.] Karon, ang imong espiritu mobalik niana nga lawas, ug kana—kana nga matang sa lawas, ang kalag, nga usa ka lawas nga dili kinahanglan mokaon ug uban pa. “Kung kining yutan-ong tabernakulo matun-as man, aduna na kita’y usa nga nagahulat,” usa ka celestial nga lawas. Ug pinaagi nianang espiritu, ug nianang kalag ug celestial nga lawas, ibangon mo pag-usab kining natural nga lawas para sa nianang halangdong Milenyum. Kita n’yo? Aduna mo’y gahum diha sa inyo karon, para buhaton kana, karon, pero kana nga gahum nga anaa sa inyo karon may kasarang nga makahimo og bag-ong kalibutan. Ang Dios walay ingon og gamay, mahuyang nga mga bahin, ug dayon dagku, og pinakakusgan nga mga bahin nga gamhanan, bisan ang labing gamay nga paghikap sa Dios makagagahum-satanan, kita n’yo, bisan ang labing gamay, gamay nga paghikap sa Dios.

8 Busa, kabalo mo, nagapaningkamot ako nga dalhon kamo diha sa pagtoo karon, kabalo na mo nga aduna gyu’y butang nga nahitabo sa inyo, ingon nga usa ka Cristohanon. Kabalo ba mo? [Nagaingon ang kongregasyon, “Amen.”—Ed.] Kaniadto nagalatas-latas kamo *dinhi* sa lapuk, nga puno og kahugawan ug sala, ug pag-inom-inom, ug pagsugal-sugal, ug—ug mga butang nga iya sa kalibutan. Bueno, sa gilayon nga mitoo kamo nga gipasaylo na ni Cristo ang inyong mga sala, gihaw-as kamo gikan nianang mga butang. Karon naipataas na kamo *dinhi*, kita n’yo, nga napaibabwan n’yo na kining tanan. Ngano man? Tungod kay nagatoo kamo nga kamo usa na ka Cristohanon. Pagkahuman nga gidawat ninyo si Cristo, ug ang Balaang Espiritu miabot sa inyo, kung ingon-ana aduna kamo’y pagtoo sa Balaang Espiritu,

nga nagahatag sa inyo og gahum para maibabwan n'yo kanang matang sa kinabuhi nga makasasala.

<sup>9</sup> Bueno, karon, ang bugtong butang nga kinahanglan ninyong buhaton, maoy mopaitaas paingon ngadto sa pagkaayo, ang madugangan pa og pagtoo, nga padayon—padayon lang sa pagpaninguha aron maangkon kini. Kita n'yo? Ug mao kana. Karon kung kamo adunay sakit, ug dili pa kamo Cristohanon, nan magmahimo kamong Cristohanon, aron nga ang gahum sa pagpang-ayo moabot sa inyo, pinaagi sa pagkahimong usa ka Cristohanon. Ug magdala kana sa inyo og pagtoo para mopaitaas ibabaw sa sala. Hatagan kamo Niini og pagtoo. Ug ang tanan nga inyong gikinahanglan, sa niini nga panaw, anaa na sa inyo karon. Ug ang bugtong butang nga kinahanglan n'yong buhaton mao'y magmaaduna kamo og pagtoo sa Dios, nga magpatungha nianang maayong mga butang gikan sa inyo, nga anaa sa inyo, pinaagi sa Balaang Espiritu. Klaro n'yo na bang nasabtan kana? Nakuha n'yo ba?

<sup>10</sup> Nagatoo ko nga giingnan na ako ni Billy, kagabii, gitawgan ako ug miingon, “Umari ka, karong buntaga, para sa usa ka tawo nga mianhi, nga nagdahum nga magpahigayon kono kita og mga panerbisyo karong semanaha, mahitungod niadtong Pito ka Selyo.” Ug dala nila ang usa ka batang masakiton, sa tanaw ko. Ug kung ania ka man karon, sir, hinumduman mo, dili mo puedeng . . . Ang imong—ang imong pagtoo ang kinahanglan maoy gamiton alang niana nga bata, kung kini—kung kini usa ka gamay'ng, masuso nga bata.

<sup>11</sup> Bueno karon tugoti ninyo akong mokuha og usa pa ka Kasulatan, kung okey lang, sa makadiyut. [Nagaingon si Igsoong Neville, “Sige lang, Igsoon. Amen.”—Ed.]

<sup>12</sup> Hinumdumi lang ninyo, karon, diha sa mga Ebanghelyo, nabasa nato dinha sa ika-16 nga kapitulo, sa pagtoo ko, diha sa Mga Buhat, kon diin sila ni Pablo ug Silas nabilanggo usa ka gabii. Ug human na silang gibunalan tungod kay gihinginlan man nila ang usa ka espirtu sa yawa gikan sa usa ka batang babaye nga manghihimalad. Ug kadto . . . Ug, ang batang babaye, ang mga agalon niini nangasuko tungod niini. Ug gipangbunalan sila, gibalhog sila sa pinakasulod sa mga bilanggoan. Ug sa diha nga nabuhat nila kadto, samtang nga sila ni Pablo ug Silas nagaampo, nagpadala ang Dios og usa ka linog ug nauyog ang patukuranan sa bilanggoan.

<sup>13</sup> Ang tigbantay sa bilanggoan nga taga-Filipos, isip usa ka centurion, nga, kung malayasan siya og iyang—iyang mga binilanggo, ang iyang kaugalingong kinabuhi ang mahimong baylo para niadtong mga binilanggo. Gihulbot sa centurion ang iyang espada ug magpakamatay na unta, sa dihang gipugngan siya ni Pablo ug miingon, “Ayaw pagdagmali ang imong kaugalingon. Ania ra kaming tanan dinhi.”

14 Ug kini nga centurion adunay, ingnon ta, nga aduna na siya'y impresyon mahitungod kang Pablo ug kanila. Tingali nanggikanta sila niadto og mga himno. Tingali nagpamatuod sila, o namuhat og mga ingon niana nga butang. Pero, unsa pa man kadto, nahibalo ang mga niini nga sila'y mga balaan nga tawo. Kabalo sila nga aduna gyu'y sa kung unsang butang nga lahi niining mga kalalakin-an. Tungod kay, sa gilayon, nangutana siya, "Unsa man ang kinahanglan kong buhaton aron maluwas? Unsa ma'y kinahanglan kong buhaton aron mamaluwas?"

15 Karon, si Pablo miingon, "Tumoo ka kang Ginoong Jesus Cristo, ug ikaw ug ang imong panimalay maluwas."

16 Bueno, karon, kung ang pagtoo kang Ginoong Jesus Cristo. . . Dili buot ipasabot niana nga ang kaluwasan niadtong *lalaki* mao ang magaluwas sa iyang panimalay. Pero kung ang maong lalaki adunay igong pagtoo mismo sa Dios para sa kaugalingon niyang kaluwasan, mahimo niyang mabatonan ang mao ra gihapon nga pagtoo para sa iyang panimalay. Ug ang iyang panimalay gikinahanglan nga moduol pud, kita n'yo, mao gihapon ang kinahanglan nilang buhaton.

17 Susama sa gibuhat kaniadto ni Job, sama sa gisulti nako sa miaging gabii, didto sa Georgia, sa usa ka panagtigum. Miingon ko, "si Job, ang ingon niya, 'Karon, wala ko kabalo kung nakasala ba ang akong mga anak, pero unsa kaha kung nakasala sila?'" Ug adunay usa ka butang nga angay pagabuhaton ni Job, aron mahimong matarung, mao kadto, ang paghalad og usa ka halad nga sinunog. Ang ingon niya nga maghalad siya og halad nga sinunog, nga kung ang iyang mga anak nakasala, nan sila mapasaylo sa ilang mga sala. Ug maayo kadto nga butang nga nabuhat sa niana nga amahan. Usa kana ka maayong-manggihunahunaon nga amahan. Nagkinahanglan kita og daghan pang ingon niana nga matang sa mga amahan karon. Ug si Job naghalad og halad nga sinunog. Kadto sa wala pa magsugod ang iyang trahedyas.

18 Apan sa diha nga ang tanan niyang mga anak nangamatay, ug ang tanan niyang mga karnero nangamatay, ug ang tanan nga aduna siya, gipangkuha, naglingkod siya niadto ibabaw sa tipun-og sa abo didto luyo sa iyang balay, nga ginakagis ang iyang kaugalingon gamit ang usa ka tipak sa kolon.

19 Namatikdan n'yo ba, human sa mga adlaw sa iyang trahedyas, niadtong misugod nga ipasig-uli na siya sa Dios pag-usab? Kon diin aduna siya kaniadto og napulo ka libo nga mga baka, ug uban pa, doble ang giuli sa Dios. Ug gidoble ang iyang mga karnero, ug gidoble ang tanan. Pero namatikdan n'yo ba? Ug gihatag usab sa Dios kang Job ang iyang pito ka anak. Nahunahuna n'yo ba kung asa sila kaniadto? Kadtong halad nga sinunog maoy nagbarug alang kanila. Naluwas sila, sa Himaya,

nga nagahulat kaniya nga moabot. Siya'y kauban nila karon. "Ikaw ug ang imong panimalay maluwas." Kita n'yo? Karon, adunay usa ka butang nga angay buhaton ni Job, aron mahimong matarung, mao ang paghalad og halad nga sinunog.

<sup>20</sup> Adunay usa ka butang nga angay mong buhaton, aron mahimong matarung, kana'y, magmaaduna og pagtoo sa Dios. Kay, pinaagi sa pagtoo kamo naluwas, pinaagi sa pagtoo kamo naayo, pinaagi sa pagtoo inyong naangkon ang tanan nga aduna kamo. Kita n'yo? Kini pinaagi sa pagtoo, nga ginatoohan n'yo kini. Karon, "Tumoo ka kang Ginoong Jesus Cristo, ug ikaw ug ang imong panimalay maluwas."

<sup>21</sup> Karon, sir, kung dala mo ang imong masuso dinhi aron maiampo, magtoo ka, ikaw mismo. Ania ako aron iaplikar ang akong pagtoo lakip sa imoha, ug magkauban, nga toohan nato, nga ayohon sa Dios kana nga bata.

<sup>22</sup> Nakita n'yo, ania sa sulod nato kana nga gahum aron mapahigayon kana. Anaa sa inyo ang gahum sa pagbuhat niana. Anaa sa matag Cristohanon ang gahum sa pagbuhat niini. Pero karon kung makaduol lamang kita... Kana nga gahum ginakontrol sa usa ka balaod.

<sup>23</sup> Sama sa kanunay ko nang gisulti, kini'y sama sa grabitasyon nga ginakontrol ang tubig, tungod kay usa kini ka balaod. Ginakontrol sa grabitasyon ang tubig.

<sup>24</sup> Ang adlaw, gikontrolar pinaagi sa—pinaagi sa...o ang kalibutan, ang pagtuyok sa kalibutan. Dili ninyo mapahimo ang adlaw nga mobuhat og usa ka butang, dayon isulti, "Sa tan-aw ko gusto ko pang matulog og mas dugay. Magpabilin ka unà dinha og usa pa ka oras." Dili kana buhaton niini, kita n'yo, tungod kay aduna ma'y balaod. Kung kamo magapamuhat sumala sa niana nga balaod, bueno, kung ingon-ana, mamahimong okey ang tanan. Kung matulog ka sa eksaktong oras, nan makamata ka sa eksaktong oras. Ug kung imong...

<sup>25</sup> Sama na lang nga aduna kita niining Lake Superior, Lake Ontario, Lake Huron, ug ang tibuok niining Great Lakes sa ibabaw dinhi. Aduna kita og napulo ka linibo ka pilo nga linibo nga kayutaan didto sa Nevada, ug California, ug Arizona, ug New Mexico, nga ugang-uga na, nga nanginahanglan nianang tubig, sa kayutaan nga makapatubo og bisan unsa. Mahimo mong pakan-on ang tibuok kalibutan, pinaagi nianang lugara, kung madala mo lang unta kini nga tubig, sa ibabaw dinhi, paingon didto sa ubos. Ug dili man kini makaapekto dinhi, tungod kay ginasustenehan man kini sa tubod. Sa pagpaagas mismo niini, ginasustenehan kini pag-usab, tungod kay ginakontrolar kana didto sa grabitasyon. Bueno, karon, kung makapamuhat kamo sumala sa balaod sa grabitasyon, mapadagayday mo kining tanang Great Lakes ug matubigan mo

ang tibuok lugar didto, ug mapakaon ang tibuok kalibutan, og walay bisan kinsa ang gutumon. Pero dili mo puedeng molingkod lang dinhi ug moingon, “Oo. Nakita man nako kini. Sigurado.” Kinahanglan mong buhaton kini.

<sup>26</sup> Bueno, ingon niana pud kini sa balaod sa Dios. Ang balaod sa Dios mao ang pagtoo. Ug aduna kita’y pagtoo dinhi, karong buntaga, para ayohon ang bisan unsang sakit, o para buhaton ang bisan unsang butang. Pero ginakontrolar kini sa usa ka balaod, ug kana nga balaod mao ang pagtoo. Ang balaod sa Dios mao ang pagtoo. Miingon si Jesus, “Bisan unsa nga mga butang nga buot ninyong pangayoon, kung mahimo mong toohan madawat mo kini, maangkon mo kini.” Mao kana. Busa, ang pagtoo mao’y nagakontrolar niini, ug ang pagtoo ginahatag sa ato pag aduna kita’y panginahanglan niini. Karon, kinahanglan natong. . . Nagagahin ang Dios og pipila sa ato og usa ka pagtoo, usa pud ka pagtoo para niadtong sa uban. Dili kini kung unsang supernatural nga gahum nga anaa sa inyo. Tungod kay, sa dihang nahimo kamong Cristohanon, kamo—kamo aduna na’y gahum, pero kulang lang mo og pagtoo para palihokon kini nga gahum.

<sup>27</sup> Busa karon, niining buntaga, sa pagduol ninyo dinhi aron iampo, hinumdumi ninyo, ginasulti kini sa Biblia. Tinuod kini. Santiago 5:14, “Kung adunay si kinsa man kaninyo, nga nagmasakiton, ipatawag kanila ang mga anciano sa iglesia. Dihogan og lana ang maong mga masakiton, ug iampo sila. Ang pag-ampo nga inubana’g pagtoo magaaayo sa masakiton, ug siya pagabangonon sa Dios.” Usa kini ka saad, kung toohan mo kini. Busa, kita n’yo, ang pagkaayo gitagana na ngadto sa indibiduwal.

<sup>28</sup> Nahitabo niadtong mga adlaw ni Jesus nga taga-Nazaret. Dili Siya makapang-ayo sa mga tawo batok sa ilang—batok sa ilang kaugalingon nga pagtoo. Ang ingon Niya, “Mahimo Ko, kung nagatoo ka. Kung nagatoo ka nga mahimo Ko kini, mahimo Ko kini.” Kung mahimo mong toohan kini!

<sup>29</sup> Busa, adunay pipila ka mga tawo nga ginadangop na hinoon ang—ginadangop na hinoon ang gahum sa pagpang-ayo ngadto sa uban, sa mga ebangelista. Dili ingon niana. Ang gahum sa pagpang-ayo anaa sa inyo. Anaa kini sa inyo. Ila man gud ginabutang ang karomata atubangan sa kabayo. Walay gahum sa pagpang-ayo ang ebangelista.

<sup>30</sup> Ang Balaang Espiritu ang adunay gahum sa pagpang-ayo, ug anaa sa inyo ang Balaang Espiritu. Ikaw kanang gamay’ng kahoy, ug ang tanang mga butang nga gikinahanglan mo anaa sa imo. Busa, kung ingon-ana, sugdan mo na ang pag-inom gikan sa saad sa Dios, nga nagaingon, “Kini ang kamatuoran. Miingon ang Dios nga pagaayohon Niya ako. ‘Pinaagi sa Iyang mga labod ako naayo.’” Mao kana. Kabalo ka ba kung unsa ang imong ginabuhat? Hinay-hinay kang nagapursigi paingon sa pagkaayo,

kana ra gyud. Kita n'yo? Ug dayon, makita sa uban kung unsa ang anaa sa imo.

<sup>31</sup> Karon kung unsa kini, “Ang pagtoo mao ang pagsalig kanato sa mga butang nga atong ginapaabot, and panghimatuod sa pagkaanaa sa mga butang nga dili makita.”

<sup>32</sup> Mahimo kong itanum kanang gamay'ng kahoy didto. Wala pa ko'y makita nga mga mansanas, pero anaa na ang mga niini dinha. Kabalo ang maong gamay'ng kahoy nga anaa na ang mga niini kaniya. Mao nga ginasugdan lang niya ang pag-inom og tubig, og motubo nga motubo, tungod kay kabalo na siya, “Ania na kini sa ako. Ipapagitib ko kini dinhi sa diyutay'ng panahon. Hatagi lang ko og gamay'ng panahon. Hatagi lang ko og gamay'ng panahon.” Magsige lang siya'g inom og tubig. “Oo, kabalo ko nga ang mga mansanas ania na sa ako. Igapamunga ko ang mga niini, sa dili madugay.” Ug mahibaloan n'yo na lang, ania na ang mga bunga. Ania na ang mga mansanas, tungod kay mitoo man siya nga ang mga niini anaa na kaniya.

<sup>33</sup> Ug kung nagatoo mo nga ang gahum sa Balaang Espiritu anaa na sa inyo, aron ayohon mo, mao na kana. Padayon lang sa pagpursigi. Kita n'yo? Aduna kamo'y pagtoo. Dili n'yo man makita ang mga resulta dihadiha dayon. Dili n'yo man makita kini.

<sup>34</sup> Karon, tan-awa n'yo, gipakamatarung ni Santiago si Abraham pinaagi sa iyang mga buhat. Gipakamatarung ni Pablo si Abraham pinaagi sa iyang pagtoo. Unsa man karon ang isulti nato, tali sa duha? Ang ginahisgotan ni Abraham maoy mahitungod sa . . . Ang buot ko diay ipasabot, ang ginahisgotan ni Pablo maoy mahitungod sa mga butang nga nakita sa Dios diha kang Abraham. Ug ang ginahisgotan pud ni Santiago maoy kung unsa ang mga butang nga nakita sa mga tawo diha kang Abraham. Kita n'yo? Karon, kita n'yo?

<sup>35</sup> Busa, kabalo na ang Dios nga, sa wala pa miabot ang bata, si Abraham aduna na'y pagtoo. Ug gipamatud-an kini ni Abraham ngadto sa Dios, pinaagi sa paglihok nga daw sa (siya) nga moabot na ang maong bata bisan siya'y baog. Wala siya'y mga anak. Patay na ang tagoangkan sa iyang asawa, ug baog pud siya. Pero, bisan pa niana, nasayod siya, “Dinha sa kung asa man anaa gyud ang maong masuso.” Nakita n'yo, nagpadayon siya sa pag-inom sa saad, nga nagasandig sa halangdong El-Shaddai sa Dios, ang *Dughan*. Nagasandig dinha, nagainom, nga nasayod mismo nga ihatag kini kaniya sa Dios; nasayod siya nga usa kadto ka saad, ug kinahanglan nga tumanon gyud kadto sa Dios.

<sup>36</sup> Ug kita'y mga anak ni Abraham. Busa mosandig gyud kita sa Iyang saad, ug manggunit dinha, nga nasayod nga buhaton gayud kini sa Dios. Iya mismong gisulti kini. Nagatoo ba kamo niini karon? [Nagaingon ang kongregasyon, “Amen.”—Ed.]

37 Kung ingon-ana ipalinya ninyo ang mga masakiton dinhi sa usa sa mga kilid o sa pikas, nga gustong maiampo. Ug sige paduolon nato dinhi ang tigulang sa iglesia ug dihogan niya ang mga niini sa lana, iampo ko sila, ug magatoo kita nga pagaayohon sa Dios ang matag usa kanila. “Kung mahimo mong toohan.”

38 Teddy, asa ka na? Duol ka ngari sa tuong-bahin. Sige maayo kana. Ug gusto ko nga tugtogon mo ang *Only Believe*.

39 Ug samtang nga nagapaduol sila, iduko lang nato ang atong mga ulo, lakip ang tanang uban pa nga mga mananambong, ug magaampo kita para sa niining mga tawo nga nagaduol ngari.

40 Among Langitnong Amahan, ginadala namo nganha Kanimo, karong buntaga, sa Ngalan ni Jesus Cristo, kining mga makaluluoy, masakiton, nanag-antus nga mga tawo nga anaa niining grabe, makatalagmanong kahimtang. Nagatoo ako Kanimo, Ginoo. Ako—kabalo ko nga ang Imong mga Pulong mao’y tinuod. Ang mga niini tinuod gayud! Dili gayud mapakyas ang mga niini, tungod kay ang mga Niini mao ang Eternal ug walay katapusan nga Pulong sa Dios. Pinakagamhanan-satanan ang mga niini, nga ingon-ana mismo ang Dios, tungod kay ang mga niini kabahin man Niya. “Sa sinugdan mao na ang Pulong, ug ang Pulong kauban sa Dios, ug ang Pulong mao man ang Dios. Ug ang Pulong nahimong unod ug nagpuyo ipon kanato.” Karon, nagatoo kami niana, Ginoo, sa tibuok namong kasingkasing, sa tibuok namong kalag, sa tanan nga ania sa kinasuloran namo. Nagatoo kami niini.

41 Ug nasulayan ko na, sa yano, pangbata nga paagi, sa pagpresentar niini ngadto sa mga tawo, aron sila makasabot ug makahibalo nga ang Gahum sa Dios anaa sa sulod nila. Kung mahimo lamang nila nga magkaaduna og ilang pagtoo ug sundon ang mga mando sa Dios!

42 Sa ingon niana nga paagi sila naluwas kaniadto. Nanagduol sila ug nanaghinulsol sa ilang mga sala, ug nabautismohan sa Ngalan ni Jesus Cristo, sumala niining Biblia, Mga Buhat 2. Ug dayon ang ingon ni Pedro, nga, “Madawat ninyo ang gasa nga Espiritu Santo.” Ug ania miabot Kini, nga eksakto mismo, tungod kay Kini mao ang Pulong sa Dios nga nadayag.

43 Bueno, karon, ang mao ra gihapon nga butang, Amahan, nahibaloan namo nga tinuod, nga sa dihang dihogan namo og lana ang mga masakiton, ug iampo sila. “Ang pag-ampo nga inubana’g pagtoo magaayo sa masakiton. Pagabangonon sila sa Dios.” Dios, hinaut nga ang matag usa nga mobiya gikan niining altar, sa palibot niining dapit karong buntaga, bug-os unta nga magmalipayon ug magkasadya, sa pagpanghibalo nga giayo na sila sa Dios. “Lakaw, ug mamaayo na.” Tungod kay ginatugyan namo sila Kanimo karon, sa Ngalan ni Jesus Cristo.



44 Ug hinaut nga ang matag usa mamaayo na, ug makuha gyud ang maong panan-awon, kung unsa ang buot ipasabot niini, sama kaniadto kang Abraham, nga tawgon kadtong mga butang nga wala nagalungtad ingon nga nagalungtad ang mga niini, bisan unsa pa ang mahimong resulta, wala kana'y unsa man nga kahilambigitan sa pagtoo. Walay unsa mang kahilambigitan ang mga resulta. Nakaangkla na ang pagtoo. "Ug ang pagtoo mao ang katinoan sa mga butang nga atong ginapaabot, ug ang ebidensya sa pagkaanaa sa mga butang nga dili makita." Dios, hinaut nga motuhop kini sa kinasuloran sa ilang mga kasingkasing, tungod kay nagkinahanglan sila Kanimo.

45 Moanha ako ingon nga Imong ubos nga alagad, aron motindog dinhi kauban ang uban pang mga alagad, ug kinasingkasing nga magaampo Dios alang niining mga tawo nga masakiton. Among ginapangamuyo kini sa Ngalan ni Jesus. Amen.

46 Adunay miingon nga si Igsoong Estle Beeler ania kono sulod sa bilding. Ug nagatoo ko nga aduna pa'y usa ka ministro dinhi, nga nangulo sa pag-ampo, karong buntaga. Gusto namong hangyoon ang tanan nga mga ministro dinhi, kung unsa man sila, kung mahimo nga mosaka kamo dinhi ug mobarug palibot niining altar kauban namo, sa makadiyut lang, gamay'ng gutlo, palihog, mga igsoon. Ug ang mga kalalakin-an... Igsoong Ben, salamat. Pagsaka mo ngari ug magtindog palibot dinhi, palibot sa altar dinhi, aron makaampo kita kauban kining mga tawo, nga pandongan sila og mga kamot.

47 Karon, samtang ginatugtog nila ang kanta. Ug ania ang mga ministro nga nagapuwesto na dinhi, aron atong, ang matag usa, makapandong og mga kamot ngadto sa mga masakiton.

48 Atong tan-awon, nga palugsong gikan niadtong tabok sa bukid didto. Makita ko ang usa ka Tawo nga nagapadulong, nga wala'y kalainan sa kang bisan kinsa nga tawo. Usa lamang Siya ka ordinaryo nga Tawo, medyo hagdison og panglawas, mora'g maluya. Ingon nga makita nato Siya nga nagatan-aw, nga ang Iyang mga mata nagatan-aw sa usa—usa ka eksena nga nagakahitabo didto ubos sa walog. Ang mga tinun-an Niya kadto. Aduna sila'y usa ka batang lalaki didto sa ubos, nga adunay epilepsy, ug walay pagduhaduha nga nagaingon sila, "Ayoha siya, Ginoo! Ayoha siya!"

49 Pero, nakita n'yo, kanang pagsulti lang og, "Ayoha siya, Ginoo, ayoha siya," wala gyud kana'y mahimo. Dili gyud kana magpulos. Kinahanglan nga aduna gyu'y sa kung unsang butang sa luyo nianang, "Ayoha siya, Ginoo, ayoha siya." Kita n'yo? Ug kung maaghat ko kamo nga toohan kana, ug toohan kana sa tibuok n'yong kasingkasing, mamaayo gyud kamo, kung mapahigayon ko nga makita gyud ninyo ang panan-awon.

50 Karon tan-awa, kadtong mga tinun-an nga atua didto, siguro ginayugyug siya, ginaapura siya og ayo, “Toohi kini, Igsoon! Toohi kini! Alleluyah! Toohi kini! Ayoha siya, Ginoo! Ayoha siya!” Pero nagpabilin gihapon didto ang yawa, tungod kay wala man siya’y igong pagtoo didto para palayason ang yawa.

51 Pero ania ang Usa nga nagapalugsong gikan sa bungtod. Ug sa gilayon nga naila sa yawa nga Kadtong Tawo mas lahi gayud kaysa uban niadtong kalalakin-an! Kita n’yo?

52 Bueno, ingon niana nga klase sa kalalakin-an ang gusto nato nga angay atua didto, sama sa atong Ginoong Jesus. Oo. Nga dili lang moadto didto para magpasundayag, kondili nagaadto, nga gihigugma ang atong Dios, nga nahibalo mismo nga gisugo kita sa pag-adto para buhaton kini. Kini ang sugo sa ato.

53 Dayon, sa dihang miadto Siya sa amahan, sa hunahuna ko dinhi nagagikan mao nga gisulat kini nga kanta, nga gilangkuban sa Pulong, ang ingon sa amahan, “Ginoo, kaloy-i ang akong anak, tungod kay siya ginasakit pag-ayo sa yawa.” Miingon, “Ginaaghat siya nga moambak sa kalayo, ug nagluya siya, ug uban pa.” Ang ingon sa lalaki, “Gidala ko siya ngadto sa Imong mga tinun-an, pero dili nila siya maayo. Pero akong—akong—nahunahuna ko . . .”

54 Miingon Siya, “Mahimo Ko, kung imong toohan. Karon, aduna Ko’y Gahum sa sulod Ko,” ingon Niya, “aron buhaton kini, kung mahimo mong toohan kana.”

55 Buhaton ba diay sa Dios nga kanang mga tawo nga nalukop-sa-kanser nga ania karong buntaga, nga nagalubog na lang, naghigdaan tungod sa kanser, ug leukemia, mga masakiton, mga nagaantus, nga pagaayohon sila sa Dios ug dayon labyan ka lang? Dili gyud tingali. Dili. Kita n’yo? Bueno, dili Siya nagakapakyas. “Mahimo Ko, kung toohan mo.” Unsa man ang giingon Niya?

For all things are possible, only . . .

Bueno, Igsoong Tyler, umari ka . . .? . . .

Now just only believe, only believe,

56 Karon, samtang nagaampo ako, gusto kong pandongan ninyo sa mga kamot ang mga tawo. Bisan unsa pa ang gikinahanglan nila, . . .? . . . ug hangtud sa tumoy sa linya.

57 Igsoong Neville, dihogan mo sila og lana, ug ang mga kaigsoonan . . .? . . .

58 Gusto nako ang tanan, nga mga mananambong, nga nagduko ang inyong ulo karon. Ang tanan sinsero gyud nga mag-ampo.

Only . . .

59 Ginoo, kaloy-i, nagaampo ako, ug ayoha kining mga tawhana, pinaagi sa Ngalan ni Jesus Cristo. Amen.

Sa Ngalan ni Jesus nga taga-Nazaret...?. . .[Blangko nga bahin sa teyp—Ed.]

<sup>60</sup> Sa ingon ka daghan, diha sa linya, ginatan-aw ko sila, para makita kung unsa ang mahimong reaksyon nila, tan-awon kung unsa ang mamahimong reaksyon nila sa usa ka aksyon. Kita n'yo? Adunay butang mismo nga ginatawag og aksyon, mitindog sila ug miduol dinhi sa atubangan. Ang usa pa ka butang, maoy kung unsa ang reaksyon nila sa maong aksyon nga ginabuhat nila. Human silang makaabot sa punto nga toohan na nila, kana bang, pag iampo na sila, mamaayo gyud sila, dayon bantayi ang reaksyon nila sa ilang aksyon.

<sup>61</sup> Karon, ang atong pastor adunay maayong mensahe para sa ato, sigurado ko, karong buntaga.

<sup>62</sup> Usa ka butang lang ang gusto nakong ikomentaryo sa makadiyut, mao kining usa ka batang babaye nga Katoliko nga nagatindog dinhi daplin sa altar. Pipila ka adlaw ang milabay siya'y atua sa balay nako, siya ug ang iyang bana. Ug dugay na nakong kaila ang iyang bana. Ug—ug adunay usa ka butang nga nahitabo samtang nagalingkod kami para sa usa ka pribadong pagpakighinabi.

<sup>63</sup> Didto kon diin miabot kanamo ang panan-awon. Didto kami. . . Kasagaran dinhi ko sa simbahan ginabuhat kini, pero puno kini niadtong buntaga, ug kung unsa pa. Ug mao nga didto na lang nako gipahigayon.

<sup>64</sup> Wala ko'y gisulti og bisan unsa, tungod kay ingon nga usa pa ka batang babaye, og ang usa pa ka butang, sa Katolikong simbahan ang iyang namat-an, ug kung unsa pa. Pero miadto siya para makighinabi para sa iyang mama. Ug niadtong tungora, nakakita ko og usa ka panan-awon mahitungod sa iyang mama. Gisultihan ko siya kung unsa ang problema sa iyang mama, ug gihulagway ko pud sa iya, ug kung unsa ang hitsura sa iyang mama. Siyempre, siya ang makasulti niana, kung kadto ba'y husto o dili. Labot pa niana wala ko pa nakita ang iyang mama, sa tibuok kong kinabuhi. Nakabalo siya niana.

<sup>65</sup> Ug ang maong babaye, karong buntaga, mianhi og miduol sa altar ug mitindog, para magpamatuod, ug gidawat niya si Cristo ingon nga iyang Manluluwas. Gibuhat niya kana dinhi sa altar, karong buntaga.

<sup>66</sup> Si Igsoong Neville, sa walay pagkahibalo niini, gidihogan ang babaye og lana. Ingon niana—ingon niana gyud kung unsa mamuhat ang Dios! Gidihogan ang babaye og lana, nga para sa masakiton. Apan tan-awa ninyo ang paglihok sa Balaang Espiritu. Karon, ingon nga siya gidihogan, sa tinuod dili man siya masakiton, apan gidihogan. Pero sa unsa mang paagi nga ang tanan namuhat og husto? Ania siya karon nga usa na ka Cristohanon, pagkahuman nga siya'y nahimong usa nang gitoohan nato nga Cristohanon. Karon, ang ingon niya, “Mahimo

ka bang mag-ampo para sa akong mama? Aduna siya’y sakit.” Ang mao ra mismo nga mama. Busa ang igdidihog nga lana nadihog na nga mas sayo.

<sup>67</sup> Sa hunahuna ko, pagka-angayan gayud, nga, kita n’yo, maluwas ang usa ka tawo. Si Cristo nagtindog para kanatong tanan. Nagatindog Siya para sa tanan. Ug sa dihadiha nga kining batang babaye nahimong Cristohanon, dayon gitinguha niya nga motindog para sa uban pa, usab, ginapakita nga ang Espiritu ni Cristo nagasulod kanato pag kita tinuod gyud nga luwas na. Bueno, maanindot kaayo kana. Akong—ginapasalamatan ko gayud kana, kanang maayo nga Cristohanong espiritu sa pagtoo. Karon, hinumdumi lang mismo.

<sup>68</sup> Karon, sa niini nga batan-ong babaye, ania siya karon, ug sa usa pa ka batan-ong babaye nga Katoliko nga mianhi. Ug gusto kong isulti kining mga pulonga, sa dili pa nako itugyan ang panerbisyo ngadto sa atong pastor, kita n’yo, mao kini:

<sup>69</sup> Karon, ang iglesiang Katoliko kaniadto sama pud niini nga iglesia. Kung balikan ninyo ug basahon ang Biblia, nga atong gitooan, ug kabalo mo nga ang iglesiang Katoliko mao ang unang Iglesia. Tinuod kana. Pero mipahilayo kini gikan sa mga Pagtulun-an Niini. *Kini* ang pagtulun-an kaniadto sa iglesiang Katoliko. Pero, kita n’yo, aduna na sila’y unom ka gatus ug uban pang mga libro nga gisulat sa mga papa ug sa uban pa, nga ingon ka balaan kono sama niining Biblia para sa ilaha.

<sup>70</sup> Busa, kita n’yo, kung unsa kini, wala gyud kamo nausab. Ang butang nga gibuhat n’yo, nakabig lang kamo. Kita n’yo? Karon kung kuhaon ninyo . . . Siyempre, sa tan-aw ko ang uban sa inyo, silang duha, karong buntaga, mga babaye. Tingali aduna pu’y pipila ka mga Katolikong kalalakin-an nga ania karon.

<sup>71</sup> Kung balikan ninyo ang kasaysayan sa iglesia, kung pangutan-on ninyo ang inyong pari, “Ang buhat sa niadtong mga apostoles sa Biblia dinhi, ingon niadto ba ang paagi nga . . . Ingon niana ba ang nahaunang mga Katoliko?” Moingon siya, “Oo.” Ug tinuod kana. Ingon niana sila kaniadto. Karon, sila, tan-awa ninyo kung unsa nga matang sa relihiyon ang aduna sila kaniadto. Nagatigum sila didto sa gamay, ordinaryo lang nga lugar. Wala gyud sila kaniadto nagaingon, “Maghimaya ka Maria” o “Amahan namo.” Tradisyon na kana sa simbahan. Unsa ang ginasulti nila kanaidto? Nanagdayeg sila sa Dios. Nanagsinggit sila. Nanaghilak sila.

<sup>72</sup> Tan-awa ninyo dinhi sa Mga Buhat 2, sa dihang ang balaang Apostol nga si Pedro, ug si Santiago, ug si Juan, ug ang tanan magkauban. Ang ingon sa Biblia nga nanagsulti sila og ubang mga pinulongan. Ug nanagsinggit sila, ug milihok ingon—ingon nga puno sa Espiritu hangtud nga milihok sila nga daw sa mga hubog, ug bisan ang kalibutan sa gawas nanagpangutana, “Dili ba kini silang tanan mga hubog?”


<sup>73</sup> Ug dayon si Pedro, ang apostol, ang balaan nga San Pedro, sa diha nga siya mitindog, ug miingon siya, “Mga katawhan ug mga kaigsoonan, kining mga tawhana wala mahubog, kondili napuno sila sa Espiritu,” sama sa—sama sa giingon sa Biblia nga sila mao. Karon, ingon niana kono ang nahaunang iglesiang Katoliko, sumala sa ilang pagtulon-an.

<sup>74</sup> Karon, nakita n’yo, pagkahuman sa mga duha ka gatus ka tuig, ang mga talahurong tawo nagsugod sa pagsulod sa iglesia. Dayon unsa’y ilang gipangbuhat? Gitukod nila ang ilang unang organisasyon didto sa Nicaea, A.D. 606. Gibuhat nila ang ilang . . . Niadtong gipahigayon ang Konseho sa Nicaea didto sa Nicaea, Roma, sukad niadto ginapasulod na nila ang tanang mga talahurong tawo, ug sila’y *nagtukod* mismo og usa ka iglesia, ug *naghimo* og usa ka iglesia.

<sup>75</sup> Human niadto, nabungkag kini sa upat o lima ka higayon. Miuswag sila—miuswag sila gikan sa ingon niana, paingon sa obispo; gikan sa obispo, paingon sa usa ka papa. Ug gikan niadto, mitungha ang Greek Orthodox ug nagkalainlaing uban pa, hangtud nga nabahin nga nabahin sila, nga miabot sa punto nga nakita n’yo kini karon. Tanan na kadto nga matang sa pagkabahin-bahin.

<sup>76</sup> Pero unsa man kanang gipaningkamotan natong buhaton, higala kong Katoliko. . . Kita n’yo, kami’y mga Katoliko, usab, kami ang nahauna, nga nagsugod nga Katoliko. Ug ang iglesia nga gitawag nila kanamo karon, kasagaran, kami ginatawag nga Pentecostal, tungod kay nagatoo man kami sa Pentecostal nga panalangin.

<sup>77</sup> Dinha kon diin naorganisar ang iglesiang Katoliko. Ug sa atong mga organisasyong Pentecostal, karon, kung—kung kini nga kalibutan magdugay pa og lima ka gatus ka tuig, kining Pentecostal nga organisasyon mamahimong mas pormal kaysa iglesiang Romano Katoliko karon. Nagapahilayo na nga nagapahilayo mismo, sa mao rang paagi. Ug sa diha nga sila nagorganisar, nagtukod sila og kapunongan gikan niini. Ug dayon nahimo silang kapunongan na lang, ug pagpamiyembro, ug mga kalag nga dili-nakabig.

<sup>78</sup> Sa akong bililhon, pinalangga nga mga igsoong lalaki ug mga igsoong babaye, kaninyong tanan. Ingon nga usa ka alagad sa Dios, wala pa gayud ako makasulti niini kaniadto, sa kalibutan, sa niining iglesia, wala pa gayud ako makasulti niini. Pero ingon nga usa ka propeta sa Ginoo, sultihan ko kamo, “Kini mao ang Kahayag. Lumakaw kamo diha Niini.” 

61-0813 Pagtoo  
Branham Tabernacle  
Jeffersonville, Indiana U.S.A.

CEBUANO

©2024 VGR, ALL RIGHTS RESERVED

VOICE OF GOD RECORDINGS  
P.O. Box 950, JEFFERSONVILLE, INDIANA 47131 U.S.A.  
[www.branham.org](http://www.branham.org)

## Pahibalo Bahin Sa Katungod Sa Pagmantala

Ang tanang katungod sa pagmantala iyaha lamang sa tag-iya. Kining basahona mahimong i-print sa printer sa balay alang sa personal nga gamit o sa pagpang-apod-apod, nga walay-bayad, ingon nga usa ka instrumento sa pagpakaylap sa Ebanghelyo ni Jesus Cristo. Kining basahona dili mahimong ibaligya, kopyahon nga pang-dinaghan, i-post sa website, i-store sa usa ka retrieval system, ihubad sa ubang pinulongan, o gamiton sa pagpangayo og mga amot nga walay ginapagawas nga kasulatan nga pagpahanugot gikan sa Voice Of God Recordings®.

Alang sa dugang nga mga kasayuran o alang sa uban pa nga ginapang-apod-apod nga mga materyales, mahimong kontakon ang:

VOICE OF GOD RECORDINGS

P.O. BOX 950, JEFFERSONVILLE, INDIANA 47131 U.S.A.

[www.branham.org](http://www.branham.org)